



ԹԵՄԱԿԱՆ ԿՅԱՆՔ

ԼՈՒՐԵՐ ԲՈՒԼՂԱՐԱՀԱՅ ԹԵՄԻՑ

Սույն թվականի փետրվարի 20-ին թեմական-վարչական գործով Բուխարեստից Սոֆիա է ժամանել Ռումինիայի և Բուլղարիայի հայոց թեմի առաջնորդ Ս. Տիրայր արքեպ. Մարտիրոսյանը:

Փետրվարի 26-ին, կիրակի օրը, թեմակալ առաջնորդի կարգադրությամբ, Բուլղարիայի հայոց բոլոր եկեղեցիներում կատարվել են հոգեհանգստյան մասնավոր պաշտոններ հանգուցյալ Ս. Սերովբե արքեպ. Մանուկյանի հիշատակին: Սույն օրը Սոֆիայի հայոց Մայր եկեղեցում, հավարտ ս. պատարագի, Ս. Տիրայր արքեպիսկոպոսը նախագահել է օրվա հոգեհանգստյան արարողությանը և խոսել հանգուցյալ Սերովբե արքեպ. Մանուկյանի կյանքի և եկեղեցանվեր գործունեության մասին՝ վեր հանելով հոգևոր վարչական ասպարեկում նրա երկարամյա ծառայությունը ի նպաստ Հայաստանյայց եկեղեցու, մասնավորապես Արևմտյան Եվրոպայի հայոց եկեղեցիների բարեկարգման ու ծաղկման, ի մխիթարություն հայ հավատացյալ ժողովրդի:

Հետևյալ օրը, փետրվարի 27-ին, Սոֆիայի հայոց առաջնորդարանում, առաջնորդ սրբապանի հրավերով և նախագահությամբ տեղի է ունեցել քահանայական հավաք, որին ներկա են եղել բուլղարահայ թեմի բոլոր հոգևոր հովիվները, ինչպես նաև թեմական խորհրդի նախագահը: Քահանայական սույն հավաքույթն անցել է քրիստոնեական ջերմ ու սրտագին մթնոլորտում: Ս. Տիրայր արքեպիսկոպոսը խոսել է քահանայական բարձր

կոչման մասին՝ տալով իր խրատներն ու հորդորները: Նա նշել է, որ Հայ եկեղեցու սպասավորները պետք է քաջ գիտակցեն կարևորությունն ու պատասխանատվությունը այն բարձր առաքելության, որին կոչված են ներանք, ի մասնավորի սփյուռքահայ պայմաններում, որտեղ բարոյական ու հոգևոր արժեքների պահպանմանը պոզընթաց այժմ առաջնահերթ նշանակություն է ստացել նաև ազգապահպանման հարցը: Առաջնորդ սրբապանը նաև ներկաներին պատմել է վերջերս դեպի Երուսաղեմ կատարած իր ճանապարհորդությունից ստացած տպավորությունների մասին և հաղորդել պատմական տեղեկություններ սուրբ քաղաքի վերաբերյալ:

Այնուհետև Ս. Տիրայր արքեպիսկոպոսի առաջարկով ժողովը ընդհանուր քարտուղար է ընտրել Սոֆիայի հայոց հոգևոր հովիվ Ս. Մեսրոպ ավագ քահանա Պենյանին: Որոշվել է տարին մեկ կամ երկու անգամ կազմակերպել նման հավաքույթներ՝ ի շինություն և ի ծաղկումն բուլղարահայ եկեղեցիների:

Մարտի 1-ին, հինգշաբթի օրը, Սրբոց Վարդանանց տոնի և Ամենայն Հայոց Հայրապետ Ս. Տ. Վազգեն Ա-ի անվանակոչության առթիվ Սոֆիայի հայոց եկեղեցում տեղի է ունեցել սուրբ պատարագ: Օրվա տոնակատարությանը նախագահել է թեմակալ առաջնորդը և Վարդանանց հերոսամարտի խորհրդի մասին արտասանել ոգեշունչ մի քարոզ՝ վեր հանելով և դրվատելով Ղևոնդյանց և Վարդանանց լուսաբերությունը վասն Հիսուսի և վասն հայրենյաց: Պատարագի ա-

վարտին առաջնորդ սրբապանը ներկաներին հրավիրել է իրենց աղոթքները մատուցել առ Աստված՝ ազգիս սիրեցյալ Հայրապետի կյանքի արևշատության և քաջառողջության համար:

Նույն օրը թեմական խորհուրդը Սոֆիայի «Բալկան» հյուրանոցի ճաշասրահում Վարդանանց մեծ տոնի հիշատակին կապմակերպել է պաշտոնական ճաշկերույթ, որին ներկա են եղել Բուլղարիայի Ժողովրդական Հանրապետության արտաքին գործերի մինիստրի տեղակալ և Կրոնական գործերի կուրիտեի նախագահ Լուբեն Պոպովը, կոմիտեի այլ պատասխանատու աշխատակիցներ, բուլղարական քույր Եկեղեցու Ս. Սինոդի գլխավոր քարտուղար Կելասի եպիսկոպոսը, Սոֆիայի բուլղար պատրիարքարանից՝ Դոմիտիան եպիսկոպոսը, Ռումին Եկեղեցու ներկայացուցիչ Մունտիանու ավագ քահանան, ռուսաց Եկեղեցու Մոսկվայի պատրիարքա-

րանի ներկայացուցիչ Նիկիտա վարդապետը, բուլղարահայ «Երևան» մշակութային կապմակերպության նախագահ Տիրան Բարիքյանը և բուլղարահայ թեմական խորհրդի լրիվ կազմը՝ գլխավորությամբ Ս. Տիրայր արքեպիսկոպոսի:

Ճաշկերույթն անցել է եղբայրական ջերմ ու խանդավառ մթնոլորտում, որի ընթացքում փոխանակվել են բաժակաճառեր և կատարվել երգեր հայերեն ու բուլղարերեն լեզուներով:

Ս. Տիրայր արքեպիսկոպոսը Պլովդիվի հայոց եկեղեցական համայնքից հրավեր ստացած լինելով՝ ժարտի 4-ին Սոֆիայից մեկնել է Պլովդիվ՝ տեղի հայոց եկեղեցում պատարագելու և քարոզելու Վարդանանց տոնի առթիվ:

Մարտի 9-ին թեմակալ առաջնորդ սրբապանը վերադարձել է իր աթոռանիստը՝ Բուխարեստ:

ԼՈՒՐԵՐ ԻՐԱՔԻ ՀԱՅՈՑ ԹԵՄԻՑ

Իրաքի հայոց թեմի բարեջան առաջնորդ Ս. Ավագ եպս. Ասատուրյանի առաջնորդական պաշտոնի ժամանակաշրջանն ավարտված լինելով՝ իրաքահայ թեմի Ազգային Կենտրոնական Վարչության հրավերով 1984 թվականի հունվար ամսի վերջերին Բաղդադ են ժամանել Բասրայի, Մուսուլի, Քերքուկի և Չախոյի հայոց թեմական խորհուրդների անդամները լրիվ կազմով՝ մասնակցելու առաջնորդի ընտրությանը:

Ընտրությունը տեղի է ունեցել հունվարի 26-ին: Ազգային Կենտրոնական Վարչության հրավերով գումարված պատգամավորական ժողովում ընթերցվել է վարչության տեղեկագիրը Ս. Ավագ եպիսկոպոսի անցնող չորս տարիների առաջնորդական գործունեության մասին: Ժողովականները հաստատել են, որ առաջնորդ սրբապանը թե՛ հոգեվոր և թե՛ ազգային-մշակութային իմաստով թեմից ներս կատարել է գնահատելի և օգտակար աշխատանք՝ միաժամանակ իբրև թեմակալ առաջնորդ ցուցաբերելով վարչական ու կապմակերպական ակնհայտ կարողություն:

Վերոհիշյալ հանգամանքները նկատի ունենալով, ինչպես նաև ըստ արժանվույն գնահատելով Ս. Ավագ եպիսկոպոսի անձնա-

կան արժանիքներն ու նրա նվիրումը իր աշխատանքին՝ ժողովը միաձայնությամբ նրան վերընտրել է Իրաքի հայոց թեմի առաջնորդ առաջիկա չորս տարիների համար:

Այնուհետև ժողովի նախագահ Ս. Գեղամ ավագ քահանա Փաշայանի և ատենապետ դոկտ. Հասրաթ Միքայելյանի ուղեկցությամբ Ս. Ավագ եպիսկոպոսն առաջնորդվել է առաջնորդարանի դահլիճ և ընդունվել պատգամավորների կողմից ջերմ ծափահարությամբ: Այստեղ առաջնորդ սրբապանը ջնորհակալության ջերմ խոսք է ասել ժողովականներին՝ իր նկատմամբ ցուցաբերված վրձտահության համար, ապա, իբրև միաբան Մայր Աթոռ Ս. Էջմիածնի, իր հավատարմությունն է հայտնել Ամենայն Հայոց Վեհափառ Հայրապետի և Մայր Աթոռի հանդեպ՝ միաժամանակ խոստանալով մնալ հավատարիմ չափակը Իրաքի ասպնջական հողի և պետության:

Հավարտ պատգամավորական ժողովի տեղի է ունեցել պաշտոնական ճաշկերույթ:

Վերընտրված առաջնորդ սրբապանն իր ուխտը կատարել է Բաղդադի հայոց Ս. Գրիգոր Լուսավորիչ առաջնորդանիստ եկեղեցում, ապրիլի 22-ին:

